

御纂醫宗金鑑

御纂醫宗金鑑卷二十二

訂正仲景全書金匱要畧註下之一目錄

黃疸篇第十六

大黃消石湯

茵陳五苓散

茵陳蒿湯

消石礬石散

梔子大黃湯

豬膏髮煎

嘔吐噦下利篇第十七

豬苓散

小柴胡湯

四逆湯

茱萸湯

半夏瀉心湯

半夏乾薑湯

黃芩加半夏生薑湯

大黃甘草湯

生薑半夏湯

文蛤湯

大半夏湯

茯苓澤瀉湯

橘皮竹茹湯

橘皮湯

通脈四逆湯

訶黎勒散

小承氣湯

白頭翁湯

桃花湯

桂枝湯

梔子豉湯

紫參湯

瘡癰腸癰浸淫篇第十八

薏苡附子敗醬散

大黃牡丹湯

王不留行散

黃連粉

跌蹶手指臂腫轉筋陰狐仙虬蟲篇第十九

藜蘆甘草湯

雞屎白散

蜘蛛散

甘草粉蜜湯

烏梅丸

御纂醫宗金鑑卷二十二

訂正仲景全書金匱要畧註下之

黃疸病脈證并治第十六

寸口脈浮而緩浮則爲風緩則爲痺痺非中風四肢苦煩脾色必黃瘀熱以行趺陽脈緊而數數則爲熱熱則消穀緊則爲寒食卽爲滿尺脈浮爲傷腎趺陽脈緊爲傷脾風寒相搏食穀卽眩穀氣不消胃中苦濁濁氣下流小便不通陰被其寒熱流膀胱身體盡黃名曰穀疸額上黑微汗出手足中

熱薄暮卽發膀胱急小便自利名曰女勞疸腹如水狀不治心中懊懣而熱不能食時欲吐名曰酒疸

註

寸口脈浮而緩浮則爲風緩則爲痺痺非中風前已詳言之矣今趺陽緊數而尺脈浮四肢苦煩身面色黃乃疸病也黃土色也土病則見之土屬脾胃脾爲陰土主濕胃爲陽土主熱故凡病疸皆爲濕熱鬱也行於外則必四肢苦煩身面發黃也蓋其人素有濕熱

外被風寒相搏內爲女勞所傷及食穀飲酒
或與濕瘀或與熱鬱皆能爲是病也若胃脈
數是熱勝於濕則從胃陽熱化熱則消穀故
能食而謂之陽黃若胃脈緊是濕勝於熱則
從脾陰寒化寒則不食故食卽滿而謂之陰
黃也陽黃則爲熱疸酒疸陰黃則爲女勞疸
穀疸也若尺脈不沉而浮則爲傷腎腎傷病
疸亦爲女勞疸也胃脈不緩而緊則爲傷脾
脾傷病疸亦爲穀疸也穀疸則食穀卽滿穀

氣不消胃中苦濁清氣阻於上行故頭眩也
濁氣流於膀胱故小便不通也女勞疸則額
上黑腎病色也微汗出濕不瘀也五心熱薄
暮發腎陰熱也膀胱急小便利下焦虛也腹
滿如水狀脾腎兩敗故謂不治也若心中懊
懣熱不能食時欲吐小腹滿小便不利雖見
目青面黑必是酒疸病也

鯀沉渴欲飲水小便不利者皆發黃

註

鯀沉主裏也渴欲飲水熱瘀也小便不利濕

鬱也熱瘀濕鬱於裏故發黃也首條謂脈浮
緩緊數皆令發黃是得之於外因也此條脈
沉亦令發黃是得之於內因也故治黃有汗
下二法也

集註

李彭曰脈沉而渴渴欲飲水小便不利則濕
熱內蓄無從分消故發黃也

疸而渴者其疸難治疸而不渴者其疸可治發於
陰部其人必嘔發於陽部其人振寒而發熱也

註未成疸前小便不利而渴者是欲作疸病也

已成疸後而渴者是熱深不已故難治也不
渴者是熱淺將除故可治也疸發於陰者人
必嘔逆嘔逆者陰裏爲之也發於陽者人必
振寒發熱寒熱者陽表爲之也此以渴不渴
別疸之難治可治以嘔逆寒熱辨黃之在表
在裏也

集註

程林曰黃家以濕熱相搏有口燥鼻燥而未
至於渴渴則津液內消邪氣獨勝不渴則津
液未竭正氣未衰治之所以分難易也陰主

裏濕勝於裏則嘔陽主表熱勝於表則振寒
發熱也此條辨疸證之渴與不渴有輕重表
裏之分也

尤怡曰疸而渴則熱方熾而濕且日增故難
治不渴則熱已減而濕亦自消故可治陰部
者裏之藏府關於氣故嘔陽部者表之軀殼
屬於形故振寒而發熱此陰陽內外淺深微
甚之辨也

腹滿舌痿黃躁不得睡屬黃家

按 舌痿黃之舌字當是身字必傳寫之譌

註 身痿而黃腹滿而躁不得睡者屬黃家之病

在裏當下之也

集 徐彬曰腹滿裏證也乃有腹滿而加身痿黃

躁不得眠痰熱外行此發黃之漸也故曰屬

黃家

諸黃家病但利其小便假令脈浮者當以汗解之

宜桂枝加黃耆湯主之

註 諸黃家病謂一切黃家病也黃病無表裏證

熱盛而渴者當清之濕盛小便不利者但當利其小便假令脈浮則爲在表當以汗解之宜桂枝加黃耆湯於此推之可知脈沉在裏當以下解之也

集註

高世栻曰利小便乃黃家一定之法故曰諸病黃家但利小便然亦自有宜汗者故又曰假令脈浮爲在表當以汗解之汗解之法宜桂枝加黃耆湯用桂枝湯以解肌肌解則汗自出加黃耆以助表表和則營衛亦通矣

桂枝加黃芪湯方

見水氣病中

師曰病黃疸發熱煩喘胸滿口燥者以病發時火劫其汗兩熱相得然黃家所得從濕得之一身盡發熱而黃肚熱熱在裏當下之

註

此詳申黃疸誤用火汗之爲病也病疸者濕熱也今濕淫於內則胸滿煩喘熱淫於內則發熱口燥若病發時復以火劫其汗則爲兩熱相合蓋黃家所得由濕得之則一身必盡熱而身面卽發黃也今因火劫誤汗而發黃

雖有表熱則不當汗也但捫其肚熱其熱在裏當下之以去其熱也

集註

程林曰濕滯於內則煩喘胸滿熱滯於內則

發熱口燥復以火迫劫其汗反致兩熱相搏殊不知黃家之病必得之濕熱瘀於脾土故一身盡發熱而黃正以明火劫之誤也若肚有熱則熱在腹可下之以去其濕熱

黃疸腹滿小便不利而赤自汗出此爲表和裏實當下之宜大黃消石湯